



## OBJAVA ZA MEDIJE

SARAJEVO, 18.7.2009. godine – Ministarstvo Zdravlja i socijalne zaštite Republike Srpske, Federalno ministarstvo zdravstva, Zavod za javno zdravstvo Federacije Bosne i Hercegovine, Institut za zaštitu zdravlja Republike Srpske, te Fond Ujedinjenih nacija za djecu (UNICEF) i Svjetska zdravstvena organizacija izražavaju duboku zabrinutost zbog ponovnog pokušaja da se diskredituje proces imunizacije u Bosni i Hercegovini, ovaj put putem pogrešno informisane grupe koja ponavlja netačne i nedokazane navode u vezi sa sigurnošću vakcina koje je nabavio UNICEF.

Ministarstva, zavodi, UNICEF i Svjetska zdravstvena organizacija također su zabrinuti vezano za kredibilnost informacija koje na raspolaganju ima „Udruženje roditelja teško oboljele djece“.

Ovakve dezinformacije mogu narušiti povjerenje javnosti u imunizaciji djece time što roditeljima i javnosti netačno ukazuju na mogućnost da su pojedina djeca ostala hendikepirana nakon vakcinacije protiv difterije, tetanusa i velikog kašlja.

Globalni savjetodavni odbor o sigurnosti vakcina (GACVS), ekspertno kliničko i naučno tijelo, koje je uspostavila Svjetska zdravstvena organizacija, redovno provjerava sve novopristigle dokaze, te ima čvrst stav da nema dokaza o toksičnosti za novorođenčad, djecu i odrasle, izložene živi iz tiomersala koji se koristi u vakcinama.

Rezultati ovih istraga bi konačno trebali prekinuti nagađanja o sigurnosti vakcina u svim zemljama, uključujući Bosnu i Hercegovinu. Konstantno ponavljanje krivih navoda samo će nanijeti štetu, jer se roditelji suzdržavaju da koriste sigurne vakcine kojim bi trebali zaštititi svoju djecu.

Imunizacija je jedna od najefektivnijih i najuspješnijih intervencija u javnom zdravstvu. Vjeruje se da su vakcine spasile čak 20 miliona života širom svijeta u posljednjih par desetljeća.

Ministarstvo Zdravlja i socijalne zaštite Republike Srpske, Federalno ministarstvo zdravstva, Zavod za javno zdravstvo Federacije Bosne i Hercegovine, Institut za zaštitu zdravlja Republike Srpske, te UNICEF i Svjetska zdravstvena organizacija još jednom podvlače da djeca u Bosni i Hercegovini nisu otrovana živom kao rezultat primanja vakcina koje je nabavio UNICEF.

Sve vakcine korištene u Bosni i Hercegovini prošle su kroz nezavisan i detaljan pregled od strane Svjetske zdravstvene organizacije kako bi se osigurala njihova sigurnost i učinkovitost, te su proizvedene u skladu sa najvišim međunarodnim standardima.

-nastavlja se-



World Health Organization  
Regional Office for Europe



-nastavak-

Zato Ministarstvo Zdravlja i socijalne zaštite Republike Srpske, Federalno ministarstvo zdravstva, Zavod za javno zdravstvo Federacije Bosne i Hercegovine, Institut za zaštitu zdravlja Republike Srpske, te Fond Ujedinjenih nacija za djecu (UNICEF) i Svjetska zdravstvena organizacija apeluju na sve roditelje da o svim pitanjima vezanim za zdravlje njihove djece razgovaraju sa porodičnim ljekarima, pedijatrima i kvalificiranim zdravstvenim stručnjacima.

Ujedno, ovo je apel svim medijima da odgovorno izvještavaju po pitanju vakcinacija, detaljnim provjeravanjem svih strana priče prije objavljivanja. Netačni navodi i javna manipulacija, najviše štete djeci u Bosni i Hercegovini. Vakcine mogu spasiti život djeteta i zaštititi ga od permanentnog invaliditeta. Bolesti koje se mogu prevenirati vakcinom mogu dovesti do teških posljedica i još uvijek se šire u svijetu. Stoga je izuzetno važno da sva djeca budu vakcinisana/cijepljena.

\*\*\*kraj\*\*\*

Za dodatne informacije:

Nela Kačmarčik, UNICEF BIH, Sarajevo, Kolodvorska 6  
nkacmarcik@unicef.org

Phone: +387 33 723 300, Mob: +387 61 192 084

[www.unicef.ba](http://www.unicef.ba)

[www.unicef.org/ba](http://www.unicef.org/ba)